



UNIVERSITÄTS-  
BIBLIOTHEK  
PADERBORN

## **Universitätsbibliothek Paderborn**

**Acta Synodalia Osnabrvgensis Ecclesiæ, Ab Anno Christi  
MDCXXVIII.**

**Brogberen, Johannes**

**Coloniæ Agrippinæ, 1657**

Pars II.

**urn:nbn:de:hbz:466:1-14298**

## CELEBRATI, PARS PRIMA.

137

*Ex Tol. c.  
anno. 10.  
q. 3.*

est, Clericum in duabus Ecclesiis conscribi non oportere; quod difficile videatur ut unus vicem duorum sustineat, & absurdum si promiscui actibus rerum turbentur officia. Id verò imprimis noxiū est, ubi plures Parochiæ seu Dignitatis uni Presbytero committuntur, quod solus per omnes Ecclesiæ nec Officium persolvere nec rebus earum necessariam curam impendere valeat. Quare tam eos qui de Sacerdotiis ejusmodi disponendi potestatem habent, quam qui ea, cœca cupiditate duci, ambiunt, commonitos volumus, ut suos affectus Canonici instituti submittant; qui vero Dispensatione Apostolica aduersus hæc se tueri velint, ut causam dispensationis obtentæ, Deo comprobent. Neque enim sublimes atque admodum literatas personas suo privilegio nudamus, modò illo recte & secundum Deum utantur.

## C A P. XXXIII. Dispensationes inspiciendæ, ut occurratur abusibus.

*Ex Conc.  
gen. c. de  
multa, de  
Prabend.  
& Dignit.*

*I Cor. 10.*

*Ber. ad  
Eug.*

*I Cor. 4.*

*Psal. 7.*

*Ber. ad  
Ruper.  
cog.*

*Ex Conc.  
Lug. c. ord.  
de offi. ord.  
lib. 6.*

**Q**uam impudenter plerique diplomatis ac dispensationibus, apud Sedem Apostolicam extortis, præter summi Pontificis mentem (qui & vult & debet porestat fibi concessa, non ad destructionem, sed ad ædificationem uti) abutantur, nullus est qui ignoret. Non prohibeo (inquit quidam vir pius) dispensare, sed dissipare. Dispensatio quidem credita est: sed hic jam queritur inter dispensatores, ut fidelis quis inveniatur. Quanquam apud illos maxima culpe pars residueat, qui, vel nulla vel minus legitima vel etiam ficta causa supplicatoriis precibus inserta, dispensationis techorum tandem eliciunt, quos apud Deum, qui renes & corda scrutatur, omnemque hypocrisim ac fraudem execratur, securos quis dixerit? Nemo tibi (ait idem ille quem jam citavimus) de dispensatione Apostolica blandiatur, cuius conscientiam Divina sententia tenet alligatam. Sed, quia pauci sunt in quorum conspectu est Deus, plerique vero qui sacra autoritate pro sua libidine passim abutuntur; fit, ut Lugdunensis Concilii, sub Gregorio X celebrati, non infalibus decretum, adverfus insolentiam ejusmodi hominum, in usum revocare cogamur: quo subnixi, cunctis, qui talibus diplomaticis fibi blandiuntur, necessitatem impone-

mus, literas suas Nobis exhibendi, visuris, num rite impetraverint, ac recte impetratis utantur. Et, ut quam maximè robustæ sint dispensationes istæ, curabimus tamen, ut menti Canonis ac summi Pontificis satisfiat: videlicet, ne animarum cura in his Ecclesiæ, Personatibus, seu Dignitatibus, quas sub hoc prætextu occupant, negligatur, nec Beneficia ipsa debitibus obsequiis defraudentur.

## C A P. XXXIV. In resignationibus ac permutationibus Beneficiorum, quæ cura adhibenda.

**P**Ostremo, quum Nobis haud clam sit, in resignationibus permutationibusque Beneficiorum, multa ancipitia perjuria committi ab his, qui frequenter subito ac non præmeditati, aut ipse aut per suos Procuratores (id quod ejusdem reatus ac culpæ est) jurejuringo ante manus impositionem testantur, in hujusmodi resignationibus seu permutationibus nullam Simoniae labem aut aliam illicitam intervenisse corruptelam, cum res crebro longe fecus habeat, per quod illi gravem in se Dei iram procul dubio provocant: majori cura, diligenterique, quam antehac fieri confuevit, pervestigatione prævia, hæc juramenta recipi convenient.

## C A P. XXXV. Præstat, paucos esse bone nos quam multos inutiles Sacerdotes.

**E**T ut cum Divo Clemente hoc caput concludamus, Melius est Episcopo, paucos habere Sacerdotes ac Ecclesiæ ministros qui possint digne opus Dei exercere, quam multos inutiles qui onus grave Ordinatori adducant.

## C A P. XXXVI. De Visitatione ultimo loco dicendum.

**D**E Visitatione (quæ est altera muneris Nostræ Episcopalis pars) hic dicendi locus non fuerit importunus. Expedientius tamen erit, hanc partem in ultimam harum Syndicalium institutionum classem rejicere, quod illuc tractetur commodius majorique cum fructu, nimis traditis jam atque expositis regulis, ad quas oporteat, veluti ad amissim quandam Visitationem redigere, ordiri atque peragere.

## P A R S S E C V N D A.

## CAP. I. De Officio privato ac publico, vita que ac moribus Clericorum generatim.

*Hier. ad  
Nepot.*

**Q**ui exacte volet cognoscere Clericorum officium & vitam, is Divum Hieronymum ad Nepotianum, ac ceteros

Patres, non minus eruditione quam vita fanaticimonia claros, qui de hac re ex professo justis voluminibus scripsérunt, perlegat. Sat Nobis in præsentiarum erit, carptim quedam delibare, ex quibus Clerici Nostræ summarim deprehendant, quam longe lateque à recta semita

semita declinaverint, subindeque errores ipsi, tam periculose digressionis commoniti, pedem in viam mandatorum Domini referant. Quod ab illis pientissimus simul ac iustissimus Deus, quum, verbo haec tenus adhortans, parum profecerit, innumeris plagiis justissime immisso commonens, manifesto requirit.

C A P. II. *Vnde Clerici appellatio derivata.*

**N** Eminem fugit, unde Clerici appellatio derivata sit; nempe à κληρον, quod forte sonat. Propterea enim (si divo Hieronymo credimus) Clerici dicuntur, quia de forte Domini sunt, vel quia ipse Dominus, sors (id est, pars) eorum est. Quia ergo vel ipsi pars Domini sunt, vel Dominum partem habent, tales se exhibere debent, ut & ipsi possideant Dominum, & possideant a Domino, quo cum Propheta confidenter dicant: Dominus pars hereditatis meæ. Non quidem quod à forte Domini Laicos secludamus, (omnes enim, qui Christo per baptismum & fidem con corporati sumus, populus acquisitionis ejus sumus, de quo Propheta dixit: Pars autem Domini populus ejus, Iacob funiculus hereditatis ejus;) sed quod Clerici, peculiari quadam ratione, ministerio Dei & Ecclesie dedicati sint.

Omnis quidem multitudo sanctorum erat, attamen Dominus Tribum Leviticam suo ministerio peculiariter delegit, quam in terra Israël præter primitias, decimas, partesque immolatorum, ac reliqua que ipsis peculiariter lex dedicavit, nihil proprium possidere, nec habere partem inter fratres voluit. Dominus enim ipse est hereditas ejus; quam in hoc elegit ex omnibus tribibus, ut flet & ministret nomini ejus. Habet Euangelium suam Magdalenam, habet & Martham: & secrevit quosdam Christus, quos dedit Apostolos, quosdam autem Prophetas, alios vero Euangelistas, alios autem Pastores & Doctores, ad consummationem sanctorum, in opus ministerii, in ædificationem Corporis Christi. Breviter, à condito orbe, & ab Ecclesiæ, quæ in Adam coepit, crepundiis, semper videntur ex hominibus assumpti quidam, constituti pro hominibus in his, quæ sunt ad Deum. Semperque visum est genus humanum a duobus ministris Dei optime regi, quæ sunt, Sacerdotalis autoritas & regia potestas. Quibus quandiu inter se convenit, bene actum est de repub. Dei: quum secus, omnia in diversum repente mutata sunt. Ponit ob oculos sermo divinus pleraque exempla, huc spectantia, perpetuo memorabilia. Sed quid attinet antiqua repetere, quum nostri temporis exempla non minus insignia, non in aures tantum, sed in oculos ipsos, influant? quæ nimis abunde docent, quantum valorum in Ecclesiam Dei invexerit, sacra prophani miscuisse.

*Luca 10.  
I Cor. 12.  
Ephes. 4.*

*Hebr. 5.  
Gela.  
Pont. ad  
Anast.  
Aug.*

C A P. III. *Clericum suo Officio intentum esse oportere.*

**O**Mnis mali seminarium, cupiditas semper fuit. Nam, dum nemo suum peragit officium, alienis semper intentus, nempe Clericus quæ Laici, Laicus quæ Clerici sunt, (ut deteriora fileamus,) usurpat; fit, ut Ecclesiæ harmonia diutius constare non possit. Obtestatur Paulus Apostolus Timotheum, qui potius contestatur simul omnes quotquot erant Timotheo successuri: Tu, inquiens, *vigila*, in omnibus labora, opus fac Euangelistæ, ministerium tuum imple.

C A P. IV. *Duplex Clericorum ministerium.*

**C**Lericis, & in primis Ecclesiæ Presbiteris, duplex ministerium, divinis & humanis legibus, est injunctum. Alterum, ut, in commissum sibi populum, Deum propitium habere, cunctis rationibus enitatur: quod non tantum sacrificiis solemnibus efficitur, sed etiam precibus, quæ à pio corde proficiuntur, teste Iacobo; qui nos ad precandum cohortans: Orate, inquit, pro invicem, ut salvemini; multum enim valet deprecatio justi affidua. Omnibus quidem dictum est: Petite, & accipietis. his vero, ut semper petant, nec pro semetipsis tantum, sed & pro tota Ecclesia Dei, ut vincat populus, qui sub ipsis est, hostes illos invisibilis, impugnantes eos qui volunt pè vivere in Christo; ut stent, sicut Moses, levatis semper interioribus animi manibus in cælum, in confractione, in conspectu Domini, ad avertendum iram ejus, ne disperdat populum suum affiduè precantem; deinde, ut offerant dona ac sacrificia pro peccatis; quemadmodum scriptum est: Quoniam sancti erunt Deo suo, & non polluent nomen ejus. incensum enim Domini & panes Dei sui offrent, & ideo sancti erunt. Alterum, ut sint Religionis magistri, proindeque ut in lege Domini meditentur die ac nocte, ut judicia Domini vera, justificata in semetipsa, desiderabilia super aurum & lapidem preciosum multum, dulciora super mel & favum, totis præcordiis amplectantur, exquirant, scrutenturque; idque non propria præsumptione, aut humano sensu, sed Spiritu sancto dictante, qui abscondit hæc à sapientibus & prudentibus in oculis suis, & revelat ea parvulis. Vnde scriptum est: Labia Sacerdotis custodiunt scientiam, & legem exquirunt ex ore ejus, quia Angelus Domini exercituum est. Qui in hoc secundo munere præstant, gregi Christi passendo admovendi sunt: de quibus suo loco dicemus.

C A P. V.

*v Tim. 5.*

*2 Tim. 4.*

*Iac. 5.*

*Matth. 7.*

*Exod. 17.  
Psal. 105.  
Hebr. 5.*

*Levit. 21.  
Psal. 18.*

*Ex decreto  
d. Clemente  
Matth.*

*II.*

*Mal. 2.*

CAP. V. *Biblia à Clericorum manibus nunquam deponenda.*

**H**IC satis est admonuisse omnes pariter Ecclesiasticis munis consecratos, ipsos precibus supplicationibusque publicis Deo persolvendis mancipari. Quas ut non tantum ore murmurarent, sed & corde persolvant, nunquam à manibus corum liber Legis (hoc est Biblia) deponatur. Nam ut quæ legunt & canunt, discant intelligere, tota vita vix sufficerit: si tamen quid sit in literis sacris, quod totum humanus intellectus assuequi poscit, aliis subinde divitiarum fonticulis ex eodem fonte semper scaturientibus.

CAP. VI. *De Horariis precibus indies perlegendis, & reformandis Breviariis.*

**V**ETERIS ergo instituti, quo sanctum est, ut Clerici, sacris iniciati, vel Sacerdottiis praesidentes, singulis diebus perlegant Horariis preces quas Canonicas appellamus, caufæ multæ, & potissimum ex quas jam commemo-ravimus, videri solent. Hic multo jam ex tempore, pio (ut spes est) animo, desideravimus repurgari Breviaria. Nam cum olim à sanctissimis Patribus institutum sit, ut sole Scripturæ sacrae in Ecclesia recitarentur, nescimus qua incuria acciderit, ut in earum locum succellentia alia, cum his neutiquam comparanda; atque interim historiæ Sanctorum tam inculte ac tam negligenti judicio conscriptæ, ut nec autoritatem habere videantur nec gravitatem. Deo itaque autore, deque Consilio Capituli Nostræ ac Theologorum aliorumque piorum virorum, reformationem Breviariorum meditabimur.

CAP. VII. *Pro cuiuslibet affectu non facile novandum quid in Ecclesiastico officio.*

**S**VNT in Clero, zelum quidem Dei habentes, sed non secundum scientiam, qui, privatis quibusdam affectibus ducti, vel testamento vel (ut vocant) fundationibus efficiunt, ut nova festa, præter Ecclesiæ autoritatem, solemniter subinde celebrentur. Quo interim fit, ut preces Horariæ, ac reliqua publice recepta, pro affectu cuiuslibet facile noventur. Id quod nobis non satis probatur; neque enim errarunt Patres; à quorum institutis, in dicendis precibus, utinam tam longe discessum non fuisset. Quod si hic singulorum affectibus indulgebitur, tandem antiquus ritus penitus evanescet.

CAP. VIII. *Quo affectu Horarias preces persolvere oporteat.*

**N**ON suffecerit autem, preces istas Horariis utcunque permurmurasse: sed, ut conciliari constitutione cautum est, Presbyter ex intimo affectu, elevataque mente in folium Deum, nocturnum hoc diurnumque sua servitutis pensum exsolvat. Maledictus enim, qui facit opus Domini negligenter. Alioqui in precantes competit: Populus hic labiis me honorat, cor autem eorum longe est à me. Quam maxime vero orantem cavere oportet, ne alio respiciat quam ad Deum. Quod si externæ gloriae auctiupandæ aut lucri gratia, denique potius ex more quam mente orare instituat, pars ejus inter hypocritas reputabitur, de quibus Dominus in Euangeliō pronunciavit, quod ament in Synagogis & in angulis platearum stantes orare, ut videantur ab hominibus, proindeque mercedem suam receperint. Et alibi ipfis interminans: Væ, inquit, vobis, Scribe & Pharisei hypocritæ, qui comeditis domos viduarum, oratione longa orantes: propter hoc amplius accipietis iudicium. Alibi quidem Dominus ait, oportere semper orare, ac nunquam deficere; fed alia prorsus ratione, quam precabantur Pharisei: nempe, secundum divi Pauli sententiam, qui divini numinis clementiam sibi conciliare voler orando, *1 Cor. 14.* oculis interioribus in cælum semper intentis, orabit spiritu, orabit pariter & mente; psalhet spiritu, psalhet & mente: quemadmodum de Anna Samuelis matre legimus, quod, multipli-cans preces, coram Domino loquebatur in *1 Reg. 1.* corde suo, tantumque labia illius movebantur, & vox penitus non audiebatur; effudit enim animam suam in conspectu Domini. Denique curandum est, ut peccantem animo, ac corde contrito humiliatoque, gratiae Deo dicantur, ac psallatur. ut enim divinus Psaltes ait: Pec-catori dixit Deus: Quare tu enarras justicias *Psal. 49.* meas? & ea quæ sequuntur. utque oculi inter orandum ab omni vanitate avertantur.

CAP. IX. *Summa devotione, Missæ sacram celebrari oportere.*

**I**AM si tanto mentis ardore quælibet preces dicendæ sunt, quanta (putamus) devotione sacro-sanctum Missæ ministerium, in quo Corporis & Sanguinis Domini Sacramenta tra-stantur conficiunturque, peragendum est? Certe graviter dolemus, atque animo inhor-escimus, ubi videmus passim, tantis mysteriis indigos, ac conductios illos ac indiguos Sa-cerdotes, publicis etiam ac manifestis crimini-bus contaminatos, se se (idque irreverenter, & interdum magis lucelli ac stipis, quam Dei causa) sacris ingerere, quorum instat interitus,

M & per-

x Cor. II.  
& perditio non dormitat. Probet (inquit Paulus) se ipsum homo, & sic de pane illo edat, & de calice bibat. Qui enim manducat & bibit indigne, judicium sibi manducat & bibit, non dijudicans Corpus Domini. Atque ideo (ut subdit) inter vos multi infirmi & imbecilles, & dormiunt multi. Nam, si nos ipsos dijudicaremus, non utique judicaremur.

C A P. X. Arguuntur, qui polluta mente  
ad Altare Domini accedunt.

Matth. 7.  
**T**erret, nec immerito, nos sermo Dominicus, qui vetat nos sanctum dare canibus, & margaritas nostras projicere ante porcos; quum quosdam leviculos Sacerdotes, illotis manibus pedibusque (ut in proverbio est,) audacius in haec sacratissima mysteria, quam in prophana, irrumpere comperimus. Quales sunt, qui humano affectu tantum, & potius ex more quam devotionis ardore, ad Altare accedunt, quorum polluta est & mens & conscientia; quos merito horrendum Euangeli exemplum (quod Ioannis 13 legimus in haec verba: Et postquam accepisset buccellam, introivit in eum satanas; & cetera quae sequuntur) ad meliorem vitam frugem, altioremque tanti mysterii contemplationem, revocaret.

C A P. XI. Revidenda Missalia ac  
Breviaria.

**P**Eciliaria Missarum argumenta, recens præter veterum institutionem inventa, etiam Patribus dislocuerunt; quod tantum mysterium pro affectu cuiuslibet tractari non debeat. Profas indoctas, nuperius Missalibus cæco quodam iudicio invectas, prætermittere per Nos licenter. Videbimur ergo operæ precium facturi, si Missalia perinde atque Breviaria pverideri curemus, ut, amputatis tantum superfluis & quæ superstitionis inventa videri possint, ea tantum, quæ dignitati Ecclesiæ & prisca institutis consentanea fuerint, relinquantur.

C A P. XII. Quæ omitti aut decurtari  
vel Organorum vel Cantorum con-  
centu haud debeant.

**I**Am & illud non recte fit in quibusdam Ecclesiis, ut, ob Cantorum & Organorum concentum, omittantur aut decurrentur ea quæ sunt præcipua. Cujus generis sunt, recitatione verborum Propheticorum aut Apostolicorum quam Epistolam vocamus, Symbolum fidei, Præfatio quæ & gratiarum actio, atque præcatio Dominica. Quamobrem haec tota distinctissime ac intelligibiliter, ut cetera omnia (si tamen non levis decurrandi causa subsit) decantentur. Sit quoque cantus, quo Presbytero respondetur, æqualis, nec præcipitatus.

C A P. XIII. Quemadmodum Missa  
legenda.

**Q** Vi legit Missam, cum reverenda mode-  
stia, clare, distincte, & exerte, legat omnia usque ad Canonem; ut, qui audiendi facri causa adstat, quod legitur, intelligat, atque ad pietatem excitetur.

C A P. XIV. Quid post elevationem  
Eucharistie agendum.

**P**Ost Elevationem consecrati Corporis ac Sanguinis Dominicæ, in nonnullis templis canunt Antiphonas pro pace, aut contra pestilentiam & mortalitatem; cum potius tum videretur silendum, & ab omni populo mortis Dominicæ commemoratio habenda, prostratisque humi corporibus, animis in cælum erectis, gratiæ agendæ Christo Redemptori, Ephes. 5: qui nos Sanguine suo lavit, morteque redemit. Cantiones vero illæ contra mortalitatem seu eladem, aut pro pace, satius post finitam Missam canuntur. Quæ ut ad Deum dirigantur, excerptæ ex Canonica Scriptura plus placuerint; quales sunt Antiphonæ, Media vita, ac, Da pacem Domine; & similes: sic tamen, ut illis etiam, quæ gloriose Virgini Matri dicatae sunt, suus honos ac locus servetur.

C A P. XV. Organorum melodia, quem-  
admodum temperanda.

**O**Rganorum melodia in templis sic adhibetur, ne lasciviam magis quam devotionem exiterit, neve, præter hymnos Divinos ac cantica spiritualia, quicquam resonet ac præsentet.

C A P. XVI. Singulis Dominicis diebus,  
quæ ipsis peculiaria sunt, Officia dicenda.

**M**Os inolevit non admodum improban- De Conf.  
dus, ut diebus Dominicis, toto ferme dij. 3.  
anno, Officium Missæ vel de sacro sancta Tri- Sabbato 2. de fe-  
nitate, vel de Spiritu sancto, dicitur. Nobis riss.  
satius videtur, ut, quæ prisca Ecclesia singulis Ex Com.  
Dominicis peculiaria fecit, observentur. Quod Tribus. 2. de cu-  
si illorum loco alia usurpanda erunt, videbitur, leb. Miss.  
quod de Resurrectione Domini est, dici Do-  
minico magis convenire; quod dies illa potissimum Resurrectioni dedicata sit. Neque ignoramus, non absque causa Concilio Tribu-  
riensi constitutum, ne, propter Missas pecu-  
liares, Missa, quam de feria vocamus, præter-  
mittatur.

C A P. XVII. Confessio, Missæ pre-  
ambulum, devote recitanda.

**C**Onfessio illa, Missæ præambulum, de-  
vote cum ministris, uno aut pluribus vi-  
cissim

cissim confitentibus, ac Sacerdotis absolutionem in verbo Christi, plena pœnitentis cordis erga Dei pietatem fiducia, recipientibus, recitanda. Ad omnes enim, Sacro adstantes, ea absolutio refertur, ut digne tantis mysteriis valeant interesse. Quamobrem, dum hæc fiunt, non sit minister accendendis luminalibus, aut aliis mentem avocantibus, (quæ prius facta oportuit,) intentus.

CAP. XVIII. *Cur Sacerdos in Altari ministrum habeat.*

Ex Conc. Tolet. c. 11. c. ut illud de conf. diff. I.  
Ec sine magna ratione in Concilio Toletano constitutum fuit, ut habeat quisque, canens Deo atque sacrificans, post se vicini solaminis adjutorem, ubi temporis, loci, sive Cleri copia suffragatur; idque propter morbos & casus diverlos qui occurrere possunt; quo is, qui impleturus Officia accedit, si aliquo casu turbatus vel in terram elitus fuerit, a tergo semper habeat, qui ejus vicem & Officium intrepidus exequatur. Aliis insuper Canonibus caveatur, ne Presbyteri, nisi duobus testibus praesentibus, celebret. Quæ decreta in quam desuetudinem abierint, in aperto est; nimur Presbyteris frequenter celebrantibus, talibus tantum adhibitis, qui vix ipsi respondere, nec, quid agatur, sciant.

CAP. XIX. *Omnis cultus Divinus summa cum veneratione peragendum.*

Ex concor. Lnd. sub Greg. X. 1 Cor. 14. 1 Cor. XI.  
IN summa, cultus Divinus, quem Sacerdos in domo Dei exhibet, debita cum veneratione peragendum est, ut & Deo gratus sit, & insipientibus placitus; qui considerantes non solum instruat, sed & reficiat. Monet siquidem divinissimus Paulus, ut omnia nostra ordinate ac honeste fiant; ac acerrime increpat Corinthios, quod irreverenter convenient in unum, ad eœnam Domini manducandam.

CAP. XX. *De vita ac moribus Clericorum.*

Col. 3.  
Vnc, de vita ac moribus, paucis videamus. De vita instituenda, sic præcepit Paulus, nedum Clericis, sed omnibus Christianis: Mortificate, inquiens, membra vestra quæ sunt super terram; fornicationem, immunditiam, libidinem, concupiscentiam malam, & avaritiam, quæ est simulacrorum servitus; propter quæ venit ira Dei in filios dissidentiæ. Nunc autem deponite & vos omnia, iram, indignationem, malitiam, blasphemiam de ore vestro, expoliantes vos veterem hominem cum actibus suis, & induentes novum, eum qui renovatur in agnitionem secundum imaginem ejus qui creavit illum, qui est omnia & in omnibus Christus. Induite vero vos sicut electi Dei,

sancti & dilecti, viscera misericordiæ, benignitatem, humilitatem, modestiam, patientiam. Super omnia autem hæc, charitatem habete; quod est vinculum perfectionis; & grati esto: verbum Christi habitet in vobis abundanter. In omni sapientia docentes & commonetes vosmetipos, in Psalmis, hymnis & canticis spiritualibus, in gratia cantantes & psallentes in cordibus vestris Deo. Omne quodcumque facitis, in verbo aut opere, omnia in nomine Domini nostri Iesu Christi, gratias agentes Deo & Patri per ipsum. Non ad oculum servientes, quasi hominibus placentes, sed in simplicitate cordis, timentes Deum. Quodcumque facitis, ex animo operamini, sicut Domino, & non hominibus. Orationi instate, vigilantes in ea in gratiarum actione. Sermo vester semper in gratia sale sit conditus; ut sciatis, quomodo oporteat vos unicuique respondere. Omnis autem sermo malus ex ore vestro non procedat: sed, si quis bonus, ad ædificationem fidei, ut det gratiam audientibus. Et nolite contristare Spiritum sanctum Dei. Modestia vestra nota sit omnibus hominibus. De cætero, quæcunque sunt vera, quæcunque pudica, quæcunque justa, quæcunque sancta, quæcunque amabilitia, quæcunque bona fama, si qua virtus, si qua laus disciplinæ; hæc cogitate; & Deus pacis erit vobiscum.

CAP. XXI. *Ob quam causam Clerici male audiant, ac puniantur.*

OLIM Clericis, hæc Apostolica præcepta tenentibus, pax super illos erat. Quo ergo non tantum vinea, sed & vineæ cultores facti sunt in direptionem? Ecce (inquit Ezechiel, ad Hierusalem verba faciens) hæc fuit iniqüitas Sodomæ, fororis tuæ; superbia, saturitas panis, & abundantia, & ocium ipsius & filiarum ejus; & manum egeno & pauperi non porrigeant, & elevatae sunt; & fecerunt abominationes coram me; & abstuli eas, sicut vidisti.

CAP. XXII. *Præcipuae cause omnis mali tres.*

PRÆCIPUA ergo cause omnis mali sunt, fastus, luxus, & avaritia; à quibus Clerici potissimum male audiunt.

CAP. XXIII. *Ambitionem ac fastum Clericali officio maxime repugnare.*

VIT omnem ambitionis radicem Christus discipulorum cordibus eximeret, parvulum in medio illorum statuit, deque primatu certare prohibuit. Qui major (inquit) est in vobis, fiat sicut junior; & qui præcessor est, sicut ministrator. Nam quis major est? qui recumbit, qui ministrat? nonne qui recumbit? Quis vero ignorat, Clericum in medio Ecclesiæ esse

Hieron.

tanquam eum qui ministrat? Quare meminimus potius officii nostri, quam dignitatis. Neque enim ad dominationem vocati sumus, sed ad opus. Non immerito Hieronymus, ut peltem quandam, fugiendos Clericos ait, qui, a speluncis domorum paternarum abstracti, & post in Ecclesia sublimati, ac Sacerdotiis ditati, vanæ gloriae & superbiæ stimulis efferruntur.

CAP. XXIV. *Omnis luxus Clerico interdictus.*Hieron. in  
Mich. c. 2.Matt. 8.  
13. 22.  
25.  
Ex Conc.  
gen. de  
vit. & ho.  
Cleric. c.  
A crapu-  
la.Ephes. 5.  
Rom. 13.  
Prov. 20.

**B**atus Hieronymus, Ecclesiæ præfectoris, qui luxu ac deliciis affluunt, Micheam describere afferit, quod ejiciendi sint de spatiois domibus, lautique conviviis, & multo labore conquitis epulis, in tenebras exteriores, ubi erit fletus & stridor dentium. Vivere quidem de Altario Sacerdoti licet, luxuriari non permittitur. A crapula itaque & ebrietate, à compotationibus illis ad haustus æquales, à luxu, ab alea, ab immoderatis sumptibus & comedationibus, Concilium generale Clericos revocat univerbos, sequutum veteris Testamenti institutum, quo ministris Templi vinum & sicker prohibebatur, ne ebrietate gravarentur corda eorum, & ut sensus eorum semper vigeret & esset tenuis. Et Apostolus ait: Nolite inebriari vino, in quo est luxuria; sed impleamini Spiritu sancto. Et iterum: Non in comedationibus & ebrietatibus; & quæ sequuntur. Atque alibi Salomon: Luxuriosa res vinum, & tumultuosa ebrietas: quicunque his delectatur, non erit sapiens.

CAP. XXV. *Clerico non licere vel cauponem agere, vel tabernas, nisi necessitatis causa, intrare.*Ex Conc.  
Agath.  
Laodic.  
Carth.  
ult.Ex Conti-  
lio Vien-  
nensi.

**O**lim tanta honestas desiderabatur in Clerico, ut ne nuptialibus quidem conviviis ipsis interesse liceret, nec immisceri spectaculis ac coetibus, ubi amatoria cantantur, aut obscenæ motus corporis, choreis, & saltationibus efferuntur; ne auditus & intuitus, sacris mysteriis deputatus, turpium spectaculorum atque verborum contagione pollueretur. Quid, si vidéret Ecclesia illa præfica, Clericos nostri temporis tabernarios, tabernisque (quasi domos non haberent) noctu diuque aligitos? quam execraretur facinus! Posthac ergo non solum nullus ex Clero fordidissimum cauponem aut tabernarium agat, sed ne ad tabernas quidem, nisi necessitatis causa, divertat: alioqui poenæ Canonice imminent ei, qui Ordini suo hanc ignominiosam notam inurere tentaverit.

CAP. XXVI. *Habitus seu exterioris corporis cultus modestia à Clericis exigitur.*

**B**eatissimus Paulus habitus modestiam & in mulieribus desiderat; quem vult verecundum esse, non in tortis crinibus, aut auro, aut margaritis, vel veste preciosa; sed quod decet mulieres, promittentes pietatem per opera bona. Itidem Apostolus Petrus eas commendat, quarum non sit extrinsecus capillatura, aut circundatio auri, aut indumenti vestimentorum cultus, sed qui absconditus est cordis homo, in incorruptibilitate quieti & modesti spiritus, qui est in conspectu Dei locuples. Quam turpis ergo putanda est in Clericis, tanto gradu sublimioribus, deformissima illa ac frequentissima nostræ tempestatis habituum variatio, quam ne inferiori quidem vasculo Apostolorum Principes permittandam duxerunt! Ex ueste apud homines sanctimoniae opinionem aucupari prohibuit Christus, qui, in omnibus operibus nostris, id quod intus est, primum respicit, mundari que jubet; deinde, quod deforis est; Væ illud horrendum Pharisæis hypocritis intermedians, qui, ut viderentur ab hominibus justi, dilatabant phylacteria sua, & magnificabant fimbrias, cum essent intus pleni rapina & imunditia. Interim tamen Euangelium non temere vestimentum Ioannis Baptista, quod illius professioni ac menti respondebat, de pilis camelorum contextum, celebrat; ac ipse Christus vestium mollitiem ac lenitatem averatur; Ecce, inquietus, qui mollibus vestiuntur, in domibus Regum sunt. Quæ omnia hoc spectant, ut velimus Clericos, præter indiciam tonsuram, uestes quoque suo Ordini congruentes deferre, quemadmodum olim generali Concilio cautum est. Pudet siquidem nos, cum videmus prodire Clericos, perinde atque seculi milites, amictos, vel qui sint ut fœmina compti. Itidem pannosi Clerici ac uestibus laceri displicant. Neque enim affectatæ fordes, aut exquisitæ deliciæ, laudem pariunt.

CAP. XXVII. *Mali exempli est, Sacerdotem se venditare in Capellatum delicato Laico aut mulierculæ.*

**M**agna eorum levitas est, in magnam Cleri ignominiam redundans, qui se Laicis, atque adeo delicatis fœminis, ventris causa, in Capellanos (ut appellant) atque Anteambulones venditant. Qui enim debebant esse gregis Duces, rediguntur in caudam, & fordidissimis quibusque negotiis alligantur. Proh nefas.

CAP.

CAP. XXVIII. *Suspecta mulierum cohabitatio Clericis interdicta.*

*Ex Concilio Ni-*  
*ceno.* **N** Iceno Concilio, neque Episcopo neque Presbytero neque Diacono neque ulli Clericorum omnium, habere secum mulierem extraneam, permittitur; nisi forte mater aut soror aut avia vel amita vel matertera sit. Nos (si tamen haec tempora tantam severitatem pati non videntur) faltem suspectam cohabitationem prohibemus.

CAP. XXIX. *Avaritia in Clero execrabilis.*

*Ex Concilio Mo-*  
*gunt.* **E**X quo in Ecclesia Dei avaritia crevit, per-  
riit lex de Sacerdote, & visio de Propheta; quemadmodum divus Hieronymus ad  
Ezech. 7. Rusticum Narbonensem ait. Nec mirum,  
Hieron. ad quod nemo possit servire Deo & Mammonam: aut enim unum odio habebit, & alterum dili-  
get; aut unum sustinebit, & alterum con-  
temnet. Vbi est enim thesaurus tuus, ibi est  
Matth. 6. & cor tuum. Habentes autem alimenta &  
I Tim. 6. quibus tegamur, quisque secundum suæ voca-  
tionis rationem, his contenti simus.

CAP. XXX. *Honesto artificio vi- etum querere Clerico licet.*

*Ex Concilio Carthago.* **Q** Vibus non suppetit ex Sacerdotio, ho-  
Cler. vid. nesto artificio viatum querant, se-  
91. dist.

quuti divi Pauli exemplum: sic tamen, ne  
fordidam aliquam artem, Sacerdotio ignomi-  
niosam, exerceant.

*Acto. 18.*  
*Ephes. 4.*  
*I Cor. 4.*  
*2 Tim. 2.*

CAP. XXXI. *Clerici ne mercatores sint, multo minus fœneratores.*

**N** Emo, militans Deo, implicet se negotiis  
secularibus, ut ei placeat cui se probavit.  
Quare multa providentia olim vetitum est, ne  
Clerici vel Monachi, mercatores (tacemus  
fœneratores) sint, lucri causa.

*In Conca-*  
*Mogunt.*  
*et I. Ne*  
*Cler. vel*  
*mo. c. fo-*  
*to tit.*

CAP. XXXII. *Damnantur Clerici super- stitiosi, scurræ, curiosi, ac leviculi.*

**R** Eperiuntur, qui superstitioni divinatio-  
nisbusque ac fortibus dediti sunt; quos  
damnamus. Sunt, qui scurras in conviviis di-  
vitum ac potentum agunt; qui, quum male  
fecerint, gloriantur & exultant in rebus pessi-  
mis: qui digni non sunt, ut Clerici appellen-  
tur. Sunt curiosi & leviculi, qui in foris, in  
compitis, in plateis, in vicis obambulant, va-  
gis oculis, effreni lingua, petulante fluidoque  
incepsu, & levitatem animi impudentiamque  
mentis ostendunt: quos aversumur. Eos vero  
tantum & re & nomine Clericos reputamus,  
qui legem Dei die noctuæ meditantur, mu-  
nus suscepimus debite exequuntur, ac vitam  
agunt Sacerdotio dignam.

*In Conc.*  
*Agat. 7. et*  
*quam sit*  
*grave. de*  
*excess.*  
*Pralat.*

*13. dist.*  
*c. his*

## PARS TERTIA.

CAP. I. *De Metropolitanis, Cathedra- libus, & Collegiatis Ecclesiis, & his ministrantibus.*

**Q** Vum Metropolitana seu Cathedra-  
lis Ecclesia Sedes fit Episco-  
pi, principemque locum in Cle-  
ro obtineat, nequaquam postre-  
mum in Reformatione locum  
obtinere debet. Nisi enim ea Ecclesia præ-  
beat omnibus que in tota Provincia aut Di-  
cesi constitutæ sunt, frustra intendimus re-  
digere in ordinem Ecclesiasticæ disciplinæ  
cæteras.

CAP. II. *De Officio Decanorum.*

**P** Orrò, quum Collegiatæ Ecclesia secunda-  
riæ sint post Cathedrales, & instar illarum  
(quod ad ordines ministrantium, Divinumque  
cultum, attinet,) constitutæ; utrobique Deca-  
nis curæ erit, ut Cleros suos ad observationem  
piorum rituum provocent ac reducant; ut, ad  
agendam vitam Clericis dignam, perpetuo co-  
hortentur ac impellant; ut à negotiis, à tumultu-

tibus mundanis revocent, ne magis seculi-  
quam Christi milites videantur; ut comedatio-  
nibus, ebrietatibus, ac omni luxui interdicant;  
denique, ut suo officio satisfacere compellant.

CAP. III. *De Officiis in ejusmodi Ec- cleesiis ministrantium, generatim.*

**S**VNT in hisce Ecclesiis diversi ministrantium  
gradus; nempe Præpositi, Decani, Archidiaci-  
coni, Scholastici, Cantores, (qui & Chori-  
episcopi,) Thesaurarii, (qui & Sacrifice seu  
Custodes,) Canonici, Vicarii, atque id genus  
alii. Interpretetur quisque vocabulum suum,  
& curet esse quod dicitur, secundum veterem  
Patrum institutionem ac regulam. Atque eo  
solo fecerint, ut, cum Nostræ, tum omnium  
piorum expectationi magna ex parte respon-  
disse videantur.

CAP. IV. *De Canonicorum vita & officio.*

**V**T de Canonicis dicamus paucis; respon-  
deat eorum vita titulo, respondeat no-  
mini: sicut re ipsa, ut sunt nomine, Canonici,  
M. 3 id est,